

內典研學要領

釋淨空

甲、古云：「成佛法華，開慧楞嚴」。必具慧解始能破迷啟悟，必真破迷關，始肯放下，然後一心念佛，求願往生，圓成道果，復何疑焉，是為鑽研群經之目的也。

乙、「佛法無人說，雖智不能解」。是以古人萬里從師，不憚勞苦。良以不遇真匠，發悟莫由。然明師良友難遇，必竭誠懺除業障，蕩盡三垢，專心真淨，得為法器，而後以真心感求，則必有應之者焉。故學人當發心至誠恭敬懇切，絕利養、戒怠慢、除成見，如是敬佛尊法事師親友，方獲感通。須知誠敬為佛門之秘鑰，此印祖屢以告誡學人者也。予學佛十有五載，始深體會誠言秘要，斯為研經修道之必具態度也。

丙、至於研究辦法，於經文長者，必先識其綱領，大段章節，剋定進度，恭恪從容，終始莫懈。研究要領，略舉其端凡十：

- (一)、釋科題 明科意由來及前後照應，使貫通全經血脈。
- (二)、明宗用 每一大科，皆須明記其主旨及功用，以識其要也。
- (三)、釋名典 名詞術語典故，必不憚煩，依疏注或佛學辭典查明之。
- (四)、釋義理 章句有道理精華之所在，須為探玄抉微。
- (五)、研究科判 於大科中，細分小科，愈細愈好，以觀其章法結構也。

(六)、試講經文 以驗研學經文是否暢達，又可練習講態也。

(七)、選誦金句 全文過長未易記誦，選其精要經句背誦之。

(八)、修法行事 經者鏡也，誦研皆照心行。印知見，正行持，方得實益。

(九)、討論問題 如有若干同學共修，日相研討，亦可助入佳境也。

(十)、參考資料 廣集諸疏及有關經論，精讀其要，採長補短，忌以情見，當以智

擇，則必能助妙悟也。

丁、理明則迷破，是謂看破，看破貴放下，此為真實功夫。必能放下，而後得自在隨緣，自行化他，作彌陀使者，誓志宣化，普令群萌，同歸淨域，此研經之果用也。